



# ТОШКЕНТ ОҚШОМИ

Газета 1966 йил  
1 июлдан  
чиқа бошлаган

ШАҲАР ИЖТИМОИЙ - СИЁСИЙ ГАЗЕТАСИ

№ 23 (9.826)

2003 ЙИЛ 3 ФЕВРАЛЬ

**ПОЙТАХТНИНГ  
Бир кунни**  
Янгиликлар, воқеалар

Илгари хабар берганимиздек, «Чилонзор буюм бозори» очик акциядорлик жамияти (олдинги «Отчопар буюм бозори»)да режалаштирилган қайта қуриш ва таъмирлаш ишларининг якунланиши муносабати билан ўтган шанба кунни ўз фаолиятини бошлади.

**ХУИ саодоси**  
Барча маълумлардан  
олинган сўнги хабарлар

**Мамлакатимизда**

## ҚИСҚА сатрларда

□ **БУГУН** Тошкент шаҳар ҳокимлигида Болалар спортини ривожлантириш жамғармаси шаҳар ҳудудий бошқармаси Ҳомийлик кенгашининг биринчи йиғилиши бўлиб ўтди. Унда кенгашининг асосий вазифалари белгиланиб, ташкилий масалалар ҳам қўриб чиқилди.

□ **БУГУН** Ҳамза туманидаги қўшимча таълим жамғармасида туман мактабларининг иқтидорли ўқувчилари иштирокида Алишер Навоий таваллудининг 562 йиллигига бағишлаб уюштирилган кўрик-танлов «Ғазалхон ёшлигим» деб номланди.

□ **ЭРТАГА** «Бунёдкор» ёшлар телеклубида клуб аъзолари «Ўзбекистон ёшларининг Афғонистон ёшларига тухфаси» лойиҳаси бўйича Афғонистоннинг юртимиздаги элчихонаси ва афғон миллати вакиллари билан учрашув ўтказишди. Тадбирдан мақсад афғон ёшларига моддий ёрдам кўрсатишдан ташқари уларни руҳан қўллаб-қувватлашдир.

□ **БУГУН** имконияти чекланган кишилар учун интернетга кириш ва тренинг бўйича Дастур Тошкент йўлдош сайтининг очилиш маросими Тошкент шаҳар ногирон аёллар ва болалар «Маънавият ва маърифат» марказидаги интернет клубида бўлиб ўтди.

□ **ҲАМЗА** туман ҳокимлигида фаоллар, ёшлар, педагоглар иштирокида бўлиб ўтган тадбир гиёвандликка қарши кураш масаласига бағишланди.

□ **НИЗОМИЙ** номидаги Тошкент Давлат педагогика университетида олий ўқув юр்தларининг математика фани ўқитувчилари иштирокида ўтказилган илмий-амалий семинар «Математика фанини ўқитишда замонавий технологияларнинг роли» деб номланди.

□ **ИҚТИСОДИЙ** тадқиқотлар марказида иқтисодиётни ривожлантиришда хорижий инвестицияларнинг аҳамиятига бағишлаб уюштирилган халқаро анжуманда иқтисодчилар, тадбиркорлар, олимлар иштирок этишди.

Тошкент шаҳар ҳокимлиги Матбуот хизмати ва ўз мухбирларимиз хабарларидан.



## «ЧИЛОНЗОР БУЮМ БОЗОРИ» ИШГА ТУШДИ



Шуни айтиш керакки, ўтган йил сентябрь ойида Чилонзор туманидаги «Чилонзор буюм бозори»нинг 31 гектарлик майдонида бошланган қайта қуриш, жиҳозлаш ҳамда ободонлаштириш ишлари поёнига етказилди. Юқоридаги ишлар самараси ўлароқ бозор ҳудудида 2.500 та савдо жойлари ташкил қилинди ва амалдаги 20 таси қайта таъмирланди, 40 та янги турдаги кичик (дўкончалар) савдо шохбчалари қурилди. Шунингдек, бозор ҳудудида 9 та омборхона мавжуд бўлиб, улардаги 1392 та сақлаш хоналари тадбиркорлар учун яна бир қулайлик ҳисобланади. Булардан ташқари 16 та умумий овқатланиш ва хизмат кўрсатиш корхоналари ҳамда 1500 та авто-

машиналарга мўлжалланган тўхташ жойлари мавжуд.

Тошкент шаҳар лойиҳалаштириш институти лойиҳасига асосан бозорни қайта қуриш ишларида муҳандислик тармоқларини янгилаш, барча санитар-маиший хизматларни меъёрлар бўйича ташкил қилиш, савдо жойларини товар маҳсулотларига қараб тақсимлаш, бозор ҳудудини ободонлаштириш ишлари кўзда тутилган эди. Бош пудратчи — «Сифат» акционерлик жамиятининг тажрибали ишчи-хизматчилари юқоридаги ишларни муддатда ва сифатли адо этдилар.

(Давоми 2-бетда.)

● Олий Мажлисининг Фан, таълим, маданият ва спорт масалалари қўмитасида Ўзбекистон Давлат жисмоний тарбия ҳамда Тошкент Давлат юридик институтлари ўқитувчи ва талабалари иштирокида иккинчи чақириқ Олий Мажлисининг IX сессиясида Юртбошимизнинг Ўзбекистоннинг янги асрдаги тараққиёти мавзусидаги маърузаларини ўрганишга бағишланган давра суҳбати бўлиб ўтди.

● Олий Мажлисининг Иқтисодиётни ислоҳ қилиш масалалари ва тадбиркорлик қўмитасининг йиғилишида эса «Тадбиркорлик фаолияти эркинлигининг кафолатлари тўғрисида»ги Қонуннинг Хоразм вилоятида ижро этилиши тўғрисидаги масала муҳокама этилди.

● Тошкентда Ташқи иқтисодий алоқалар агентлиги ва «ПОЙТАХТ-ЭКСПОРТ» экспортчи ва сармоядорларга кўмак кўрсатиш маркази ҳамкорлигида «Ташқи иқтисодий фаолиятни тартибга солиш ҳамда маҳаллий ишлаб чиқарувчиларга ёрдам бериш» мавзусида семинар бўлиб ўтди. Унда истеъмол товарларини сертификатлаш ва маркалаш, божхона қонунчилигига киритилган ўзгаришлар каби масалалар хусусида гап борди.

● Жиззахлик шифокорларга республика эндокринология илмий-тадқиқот институти олимлари томонидан ош тузи таркибидаги йод микдорини аниқлайдиган замонавий индикатор совға қилинди.

● Тошкент Давлат техника университетида мутахассисларни тайёрлаш сифатини яхшилашга бағишланган илмий-амалий анжуман бўлиб ўтди.

## Жаҳонда

● Украина пойтахти Киевда ҳар томонлама ҳамкорлик бўйича Ўзбекистон — Украина қўшма комиссиясининг навбатдаги бешинчи мажлиси бўлиб ўтди. Ҳукуматларо комиссия иши якунларига кўра баённома имзоланди.

● АҚШда ўтган шанба кунни юз берган «Колумбия» космик кемасининг ҳалокати натижасида 7 та астронавт ҳалок бўлди, кеманинг 1200 дан ортиқ парчалари Луизиана ва Техас штатларининг устига тушди. Америка космик агентлиги (НАСА) томонидан белгиланган эксперт комиссияси ҳалокат сабабларини ўрганмоқда.

● Япониянинг Амори шаҳрида 5-Осиё кишики ўйинлари бошланди. Унда Осиё китъасининг 38 та мамлакатидан ташриф буюрган спортчилар галаба учун кураш олиб бормоқдалар. **Кеча** Осиё ўйинларида юртимиз спортчилари ўз иштирокларини бошлашди.

● Европа Иттифоқи Шимолий Корея ядро дастури атрафидаги вазиятни муҳокама қилиш мақсадида Пхеньянга Греция ташқи ишлар вазири Георгиос Папандреу бошчилигидаги делегацияни юборишни режалаштирди.

● Хитойда 1 февралдан ой тақвими бўйича қора эчки йилнинг кириб келиши тунги мушакбозликлар орқали кенг байрам қилинди. Ушбу байрам бу ерда бир ой давом этади.











